

BANTANG AWIG-AWIG DESA ADAT KEROBOKAN

MURDDHA CITTA	
SARGA SIKI ARAN LAN WEWIDANGAN	
SARGAH KALIH PATITIS LAN PAMIKUKUH	
SARGAH TIGA SUKERTA TATA PAKRAMAN	
Palet 1 Indik Krama	
Palet 2 Indik Pamucuk Désa	
Palet 3 Indik Kulkul	
Palet 4 Indik Paruman	
Palet 5 Indik Druwén Désa	
SARGAH PAT SUKERTA TATA AGAMA	
Palet 1 Indik Déwa Yadnya	
Palet 2 Indik Resi Yadnya	
Palet 3 Indik Pitra Yadnya	
Palet 4 Indik Manusa Yadnya	
Palet 5 Indik Bhuta Yadnya	
SARGAH LIMA SUKERTA TATA PAWONGAN	
Palet 1 Indik Pawiwahan	
Palet 2 Indik Nyapihan	
Palet 3 Indik Sentana	
Palet 4 Indik Warisan	
SARGAH NEM SUKERTA TATA PALEMAHAN.....	
Palet 1 Karang, Tegal, lan Carik	
Palet 2 Pepayonan	
Palet 3 Wewangunan	
Palet 4 Wewalungan	
Palet 5 Indik Karesikan utawi Kabersihan	
Palet 6 Indik Dusta lan Bhaya	
Palet 7 Panyanggran Karyan Krama	
SARGAH PITU WICÀRA LAN PAMIDANDA	
Palet 1 Indik Wicàra	
Palet 2 Indik Pamidanda	
SARGAH KUTUS NGUWAH-UWUHIN AWIG-AWIG	
SARGAH SIYA SAMÀPTA	

AWIG-AWIG DESA ADAT KEROBOKAN

MURDDHA CITTA

OM AWIGHNAM ASTU, DESA TATA CARA, OM NAMA CIWAYA

OM CRI PASUPATASTRA, OM AWIGNAM ASTU NAMA SWAHA.

Mangkana panamaskara mami kabehri /Sang Hyang Parama Wisesa siddha amanggih dirgayusa tan kataman lara wighna pinakang hulun kabeh krama Desa Adat Kerobokan. Putusing panugran i krama Desa Adat Kerobokan, gumawe awig-awig Desa Adat, Desa tata cara, wastu kasiddan prayojana mami kabeh kateka tekeng dlaha, prasama pada sumengkem mwang amanggehakem kadi linging awig-awig.

Sembah bakti miwah pangastawan krama majeng ring paduka Bhatàra - Bhatarì sesuwunan sami, riantukan wantah malarapan panghyangning kalih paswécan Ida Sang Hyang Widhi Wasa asung kretawarànugraha nyresti jagat jangkep rawuhing sadagingnya sami, mawinan wénten kahuripan sekala niskala ring Bhuwana Agung miwah ring Bhuwana Alit. Manut dresta, Désané kamanggehang dados pasayuban Krama Désa rawuhing kulawarga pawongannya sami, mawastu raris Désané kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Désané taler kamanggehang pinaka pawakan bhàwa mahurip, sané kacirénin antuk wéntené pakilit Tri Hita Kàrana sané tan dados pasahang, luwiré :

- ha. Parhyangan, inggih punika : sahanan parhyangan panyiwian Désa, genah ngarcana bhàwan Ida Sang Hyang Parama Wisésa, pinaka jìwa pramanan Désané;
- na. Pawongan, inggih punika : gebogan Krama rawuhing warga Désa maka sami pawakan Tri Kaya pinaka bàyu pramàdan Désané, mawinan Désané prasida maolah prawretti;
- ca. Palemahan, inggih punika : sahananing pakarangan, tegal, carik, miwah sétra sakekuwuban Désa Adat, pinaka sthùla sariran Désané.

Awig - awig puniki ngawit puput kapirarem nemoning rahina Redite Pon Wuku Medangsia Tang/Pang ping 13, sasih 10, Isaka 1916, tanggal 24 bulan April warsa 1994 ring Wantilan Pura Desa lan Puseh lan kaparipurnayang nemoning rahina Saniscara Wage Wuku Julungwangi tanggal 3 Oktober 2009.

SARGAH SIKI
ARAN LAN WEWIDANGAN DESA
Pawos 1

- (1) Désa Adat puniki mawasta Désa Adat Kerobokan.
- (2) Jebar kekuwub wewidangannya mawates nyatur désa :
- ha. Sisi Kangin : 1. Desa Pakraman Ubung.
2. Desa Pakraman Padangsambian.
3. Desa Pakraman Denpasar.
 - na. Sisi Kelod : Desa Adat Seminyak.
 - ca. *Sisi Kauh* : 1. Desa Adat Tandeg.
2. Desa Adat Padonan.
 - ra. Sisi Kaja : 1. Desa Adat Padangluwih.
2. Desa Adat Dalung.
- (3) Sané kamanggehang ngranjing dados kekuwub wewidangan Désa Adat Kerobokan, manut dresta, inggih punika :
- ha. *Pupulan karang paumahan sané sinanggeh Palemahan Désa Adat, sane kaupapira antuk banjar.*
 - na. Sétra, carik miwah tegal sané wénten ring kekuwub wewidangan Désa Adat puniki, sajabaning Palemahan Désa Adat, manggeh ngranjing dados Telajakan Désa.
 - ca. *Banjar sane wenten ring kakuwub Desa Adat Kerobokan wantah ngupapira wates palemahan Desa.*
- (4) Désa Adat puniki ngawidangin 3 Kecamatan, 4 Kelurahan, 2 Desa Dinas, kaepah dados 50 Banjar Adat, luwiré :
- ha. Ring Kelurahan Kerobokan Kaja :
 - 1. Banjar Gadon.
 - 2. Banjar Beluran.
 - 3. Banjar Babakan.
 - 4. Banjar Batuculung.
 - 5. Banjar Batubidak.
 - 6. Banjar Jambe.
 - 7. Banjar Petingan.

8. Banjar Muding Mekar.
9. Banjar Muding Kelod.
10. Banjar Muding Tengah.
11. Banjar Muding Kaja.

na. Ring Kelurahan Kerobokan :

1. Banjar Kesambi.
2. Banjar Gede.
3. Banjar Tegeh.
4. Banjar Kancil.
5. Banjar Campuan.
6. Banjar Padang.
7. Banjar Peliatan.
8. Banjar Anyar Kelod.
9. Banjar Anyar Kaja.
10. Banjar Silayukti.

ca. Ring Kelurahan Kerobokan Kelod :

1. Banjar Pengipian.
2. Banjar Pengubengan Kangin.
3. Banjar Pengubengan Kauh.
4. Banjar Taman Mertanadi.
5. Banjar Taman.
6. Banjar Umasari.
7. Banjar Batubelig.
8. Banjar Umalas Kauh.
9. Banjar Umalas Kangin.
10. Banjar Kuwum.
11. Banjar Semer.
12. Banjar Dukuh Sari.
13. *Banjar Batubelig Kangin.*

ra. Ring Kelurahan Seminyak : Banjar Basangkasa

ka. Ring Desa Padangsambian Kelod :

1. Banjar Abasan.
2. Banjar Tegal Buah.
3. Banjar Teges.
4. Banjar Tegallantang Kaja.
5. Banjar Tegallantang Kelod.
6. Banjar Umadui.
7. Banjar Jabapura.
8. Banjar Batubolong.
9. Banjar Padang Sumbu Kaja.
10. Banjar Padang Sumbu Tengah.
11. Banjar Padang Sumbu Kelod.

da. Ring Padangsambian Kaja :

1. Banjar Robokan.
2. Banjar Umaklungkung.
3. Banjar Lembang.
4. Banjar Tegehsari.

Pawos 2

- (1) Sowang-sowang Banjar Adat patut madruwé piranti-piranti pamekasnya : Balé Banjar, Parhyangan, Kulkul, miwah sane lianan.
- (2) *Krama Banjar Adat wenang kaepah dados Témpekan manut Pamutus Paruman Krama Banjar sowang-sowang.*

Pawos 3

- (1) Sowang-sowang Banjar Adat wenang ngardi awig-awig, pararem-pararem maka pamikukuh Banjar Adatnya sowang-sowang.
- (2) Awig-awig, pararem-pararem Banjar Adat tan wenang lémpas ring Awig-awig Désa Adat Kerobokan.
- (3) Awig-awig Banjar Adat patut kalinggatanganin antuk Bandésa.
- (4) *Sahanan Témpekan Banjar tan wenang ngardi Awig-Awig, saantukan Témpekan punika wantah sinanggeh pah-pahan Banjar Adat.*

SARGAH KALIH
PATITIS LAN PAMIKUKUH

Pawos 4

Désa Adat Kerobokan ngamanggehang pamikukuh, minakàdi :

- ha. Pancasila.
- na. *Undang-Undang Dasar 1945, pamekas pasal 18B ayat (2).*
- ca. Tri Hita Kàrana, manut sadàcara Agama Hindu.
- ra. Hak Azasi Manusia utawi HAM.
- ka. Uger – uger saking Guru Wisesa indik Desa Adat.

Pawos 5

Luwir Patitis Désa Adat Kerobokan :

- ha. Mikukuhin miwah ngrajegang Sang Hyang Àgama Hindu.
- na. Ngutamayang tata prawrettining maàgama.
- ca. Ngrajegang kasukertan Désa saha Pawongannya sekala lan niskala.
- ra. Ngrajegang kasukertan druwen desa.

SARGAH TIGA
SUKERTA TATA PAKRAMAN

Palet 1

Indik Krama.

Pawos 6

- (1) *Sahananing sang jenek mapaumahan ring wewengkon wewidangan Désa Adat puniki sinanggeh krama Désa, Krama Tamiu lan tamiu.*

- (2) Krama Désa inucap ring ajeng, linggihnyané wénten 2 (kalih) soroh :
- ha. Krama Adat inggih punika, krama sané nyarengin adat, maagama Hindu Bali, sampun merabian lan tedun mabanjar Adat, mipil tur sareng nyungkemin Kahyangan Tiga, Desa Adat Kerobokan.
 - na. Krama tamiu inggih punika, krama saking dura Desa Adat Kerobokan, maagama Hindu, nenten mipil sakewanten sareng nyungkemin Kahyangan Tiga lan nganutin dresta Desa Adat Kerobokan.
- (3) Tamiu inggih punika warga sane nenten megama hindu.
- (4) Pepalihan krama adat manut angka (2) aksara ha, inggih punika :
- ha. Krama Wedan : krama sane sampun jumenek tur medesa adat wit saking kaluhuranya utawi krama sane sampun jumenek lami nyane 10 (dasa) warsa.
 - na. Krama Paron : krama saking dura desa sane sampun mesadok ring prajuru banjar lan desa, lan sampun madruwe tanah karang paumahan, tur sampun jenek ngawit 6 (nem) sasih nyantos 10 (dasa) warsa.
 - ca. Krama Penyade : krama sane mewiwit saking Desa Kerobokan sane sampun metilar dados krama adat Desa Adat seosan, nanging waris ipun kantun ring Desa Adat Kerobokan turmaning mewali malih dados krama Desa Adat Kerobokan.
 - ra. Krama Pengele : krama saking dura desa sane wenten pakilitan ring krama wedan lan jumenek ring krama wedan.
 - ka. Krama Balu : krama sane katinggalin sangkaning sane istri utawi sane lanang padem utawi sangkaning nyapihan. Krama balu kepah dados 4 (petang) soroh :
 - Balu makrambian : Balu sane sampun madruwe pianak cucu.
 - Balu ngempu : Balu sane madruwe pianak kantun alit.
 - Balu ngatung : Balu sane nenten madruwe pianak/santana.
 - Balu ngelisting : Balu sane nenten madruwe pianak, arta warisan lan sameton.
 - da. Krama daha taruna : krama sane mayusa 15 nyatos 30 warsa sane durung marabian.
 - ta. Krama datu : krama sane mayusa lintangan ring 30 warsa nenten naenan alaki rabi nyantos lampus.
- (4) Seosan ring krama inucap, ring Desa Adat taler wenten kebawos Tamiu, inggih punika kaluwarga sane nenten maagama Hindu, wantah sareng nyungkemin ring pawongan lan palemaham Desa Adat Kerobokan.

Pawos 7

Tata caraning ngeranjing dados krama desa :

- (1) Sahanan krama Désa sané sampun marabian, patut ngawit tedun makrama.
- (2) Sesengker ngawit tedun dados krama desa :
 - ha. Marep ring Krama Désa sané mawit saking pawiwahan, 6 (nem) sasih saking puput makalakalaan.
 - na. Marep ring Krama Désa sané mawit saking ngarangin, kasulurang manut pararem.
- (3) Sang saking séwosan désa yaning sareng tedun makrama désa ring Désa Adat Kerobokan patut keni pecingkrem, sané agengnyané kasulurang manut pararem.
- (4) Yan wénten krama saking séwosan désa sareng ngranjing makrama désa ring Désa Adat Kerobokan patut kadulurin antuk ilikita saking Desa wed nyane sané jangkep.

Pawos 8

Tata caraning ngeranjing dados tamiu :

- (1) Masadok ring Kelihan Banjar manut ring pikamkam kedinasan.
- (2) Naur prabea manut pararem Banjar/Desa Adat Kerobokan.

Pawos 9

Swadarmaning krama desa lan tamiu :

- (1) Swadharmaning Krama Adat, luwiré :
 - ha. Satinut ring sadaging Awig-awig, Pararem lan Pasuara Désa Adat.
 - na. Tan maren sareng mautsaha, mangda Désané prasida nyujur patitis, sakadi sané munggah ring Pawos 4 ring ajeng.
 - ca. Sayaga sareng natakin panes tis kértiyasan Désa Adat.
 - ra. Keni peturunan, peson-peson lan ayahan mamungkul.
- (2) Swadharmaning Krama Tamiu inggih punika :
 - ha. Satinut ring tetiwak Désa Adat ngeninin indik ngupadi kasukertan Désa Adat ring sekala, niskala.
 - na. Tan kéngin nungkasin kértiyasan Désa Adat.
 - ca. Patut mesadok ring kelihan banjar ritatkala nerima tamiu nyantos lintang ring 24 jam.
 - ra. Ngaturang punia lan ayah ring parhyangan manut kabuatang.

- (3) Swadharmaning Tamiu, inggih punika :
- ha. Satinut ring tetiwak Desa Adat ngeninin indik pawongan lan palemahan.
 - na. Tan kengin nungkasin kertiyasa Desa Adat Kerobokan.
 - ca. Patut mesadok ring kelihan banjar ritatkala nerima tamu nyantos lintang ring 24 jam.
 - ra. Keni punia manut pararem.

Pawos 10

Kepatutan krama lan tamiu :

- (1) Kapatutan Krama Adat sekadi ring sor :
- ha. Polih pasayuban saking desa.
 - na. Polih kasukertan miwah kasucian déwék, parhyangan miwah karangnyané;
 - ca. Polih kasukertan padruwéannyané sowang-sowang.
 - ra. Ngemedalang usul ritatkala wenten paruman ring desa sane mabuat.
 - na. Dados prajuru ring banjar utawi desa, upasabha lan kertha desa manut pararem.
 - ka. Polih pamutus saking prajuru ritatkala wenten wicara.
 - da. Polih leluputan manut pararem.
- (2) Kepatutan Krama Tamiu :
- ha. Patut madana punia ring Desa / Bañjar Adat, manut pararem.
 - na. Patut polih pasayuban marupa pitulung rikañjekan katibén pañcabhaya.
 - ca. Polih pamutus saking prajuru ritatkala wenten wicara.
- (3) Kepatutan Tamiu :
- ha. Patut madana punia ring Desa / Bañjar Adat, manut pararem.
 - na. Patut polih pasayuban marupa pitulung rikañjekan katibén pañcabhaya.
 - ca. Polih pamutus saking prajuru ritatkala wenten wicara.
- (4) Sinalih tunggil krama Désa lan tamiu tan kadadosang ngajak wong wadon tuna susila ngranjing miwah ngrerep ring wewidangan Désa Adat Kerobokan, sapisira ugi sané tiwal, patut keni pamidanda manut pararem.
- (5) Krama desa lan tamiu tan kadadosang makta, nganggen, madruwe sarana, sane ten manut ring uger-uger Guru Wisesa, sapisira ugi sane tiwal, patut keni pamidanda manut pararem.

Pawos 11

Wusan dados Krama Désa :

- (1) Sangkaning :
 - ha. Séda.
 - na. Pinunas ngraga.
 - ca. Kanorayang, malantaran piwal ring Awig-awig miwah Pararem Désa, utawi tan satinut ring pituduh Prajuru sajeroning indik nyupat sikian, minakadi nénten prasida ngeséhin prawerti.
- (2) Sang wusan dados Krama Désa taler kebawos wusan mebanjar, mangde nenten kebawos empak ngelanting.
- (3) Sang wusan dados Krama Désa tan polih pahpahan druwén Désa utawi Banjar, tur tan polih pasayuban malih sajeroning ala ayu.
- (4) Sang kanorayang dados malih tedun makrama désa yening sampun meseh parisolah ipun tur malarapan antuk katerima ring Banjar Adat sowang-sowang, maweweh pamogpog manut pararem.

Pawos 12

Ayah-ayahan krama.

- (1) Satunggil Krama, manut paetangan nyane, keni ayah-ayah sekadi ring sor :
 - ha. Ayahan utama inggih punika ayah sane kemargiang olih krama sane ngemargiang swadarma eka jati utawi dwi jati.
 - na. Ayahan ngarep inggih punika ayah sane kemargiang olih krama sane dados krama adat sane jangkep alaki rabi. Ayahan ngarep mapiteges paturunan, peson-peson miwah ayahan mamungkul.
 - ca. Ayahan balu inggih punika ayah sane kemargiang olih krama balu sekadi ring sor :
 - Balu mekrambian, keni ayah lan urunan separo.
 - Balu ngempu, keni ayah lan urunan separo.
 - Balu ngatung, tan keni ayah, nanging keni urunan separo
 - Balu ngelisting, luput manuk
 - ra. Ayahan daa teruna : luput manuk.

- (2) Soang-soang ayahan punika wantah kemargiang siki kamenten, manut kawentenang krama iuncap.
- (3) Sahananing krama sané sampun munggah daa truna, sowang-sowang patut sareng ngayah sané kawastanin ayah daa truna
- (4) *Ayah daa truna punika kapupulang sajeroning Sekaa Teruna.*
- (5) Sekaa Truna Truni punika patut wénten ring sowang-sowang Banjar Adat.
- (6) Krama Adat wenang nyada sané mateges mademang ayahan, yan sampun kapastika, luwiré :
 - ha. Sungkan tahunan.
 - na. Yan sampun maderbé pangentos utawi panyeledii.
 - ca. Risampun mayusa 60 warsa yan tan maderbé panyelidii.
- (7) Krama Adat kadadosang :
 - ha. Mapuangkid utawi tan tedun ngayah / parum :
 - 1). Rikala nangun yadnya, kaluwasan masengker déwasa.
 - 2). keni dedawuhan saking Guru Wisésa.
 - 3). kapialang, luwiré : sungkan, matepetin, kalayusekaran, lan sakancan punika.
 - na. Dados kawakilang ring jadma tiosan, sané sampun menék daa truna.
 - ca. Dados mogpog utawi nutug ayahan antuk arthabrana utawi ngampel, pradé makarya ring dura désa.

Pawos 13

Tata titi Krama Desa utawi Tamiu, sane nampi krama tamiu utawi tamiu :

- (1) Krama Desa utawi tamiu sané nampi krama tamiu utawi tamiu jantos marerepan :
 - ha. Mangda masadok ring Kelihan banjar, arahina saking ngawit marerepan ring genah sang nerima.
 - na. Yéning krama tamiu utawi tamiu punika madunungan jantos asasih, Kelihan Banjar patut nuréksain kabuatan nyané madunungan, kaadungang ring ilikita sané ninasang kabuatan ipuné.
- (2) Yening kabuatannyané tan manut ring sané katinasang, Kelihan Banjar wenang ngwaliang krama tamiu utawi tamiu punika.
- (3) Yéning krama tamiu utawi tamiu punika jenek rawuhing nem sasih taler durung kasadokang, krama desa utawi tamiu sané nampi patut keni pamidanda manut pararem.

Palet 2
Pamucuk Desa

Pawos 14

Pamucuk Desa Adat Kerobokan inggih punika :

- ha. Upasaba Desa.
- na. Kertha Desa.
- ca. Prajuru Desa.

Upasaba Desa
Pawos 15

- (1) Upasaba Desa, inggih punika pamucuk desa sane sampun wikan ring indik sastra agama, upakara lan upacara, karya undagi, padewasan manut wariga siosan sane mabuat.
- (2) Swadharma Upasaba Desa, wenang mapaica saluiring dharma tatimbang ring Prajuru Desa :
 - ha. Indik parhyangan.
 - na. Indik pawongan.
 - ca. Indik palemahan.

Tata cara ngadegang Upasaba Desa

Pawos 16

- (1) *Upasaba desa akeh nyane manut kabuatang*
- (2) Sane dados kaadegang Upasaba desa inggih punika :
 - ha. Mawiwit saking krama wedan, naenin dados prajuru desa utawi prajuru banjar.
 - na. Sang sane sampun sinanggeh wikan ring tata cara, sastra, budaya Bali lan dresta.
 - ca. Sang sane sampun sinanggeh uning ring indik upakara lan upacara yadnya
 - ra. Sang sane sampun sinanggeh uning ring indik karya undagi.
 - ka. Sang sane sampun sinanggeh uning ring padewasan manut wariga.

- da. Sang sane sewosan ring punika, sane ngeranayang utawi ngawinang desane nemuang rahayu.
- ta. *Ritatkala kacawis, mayusa sakirangnya 45 warsa.*
- sa. *Kapilih olih prajuru desa suwen nyane dados Upasaba Desa 5 warsa*

Kertha Desa

Pawos 17

- (1) Kertha Desa inggih punika genah prajuru desa lan krama desa nunas dharma tatimbang yening wenten nepasin daging awig-awig.
- (2) Swadharma Kertha Desa, wenang mapaica saluwuring dharma tatimbang ring Prajuru Desa.
 - ha. Indik prajuru desa sane singsal ngemargiang awig - awig.
 - na. Indik krama desa sane pacang nguwah nguwuhin awig-awig Desa Adat.
 - ca. Indik wenten wicara ring Desa Adat sane kasengguh perkara.
- (3) Kertha Desa patut ngicenin dharma tatimbang lan ngewantu prajuru desa lan krama desa yening wenten pikobet indik pemargin awig-awig.

Tata cara ngadegang Kertha Desa

Pawos 18

- (1) *Kertha Desa akeh nyane manut kabuatang.*
- (2) Sane dados kaadegang Kertha Desa luwirnya :
 - ha. Mawiwit saking krama wedan, naenin dados prajuru desa utawi banjar,
 - na. Wikan ring hukum adat / agama lan hukum Nasional,
 - ca. *Ritatkala kacawis, mayusa sakirangnya 45 warsa,*
 - ra. *Kapilih oleh Prajuru Desa suwenyane dados Kertha Desa 5 warsa.*

Prajuru Desa

Pawos 19

- (1) Sane kasinanggeh Prajuru Desa inggih punika :
 - ha. Bandesa.
 - na. Patajuh.
 - ca. Panyarikan.
 - ra. Patengen.
 - ka. Kasinoman desa.
 - da. Pesayahan.
- (2) Prajuru desa patut :
 - ha. Mawiwit saking krama wedan, naenin dados kelihan /prajuru banjar.
 - na. Waras lan tan cacad angga pramana.
 - ca. Mapari laksana becik lan ten cacad hukum.
 - ra. Jujur, pradnyan, wicaksana, madrebe pangunadika, lascarya ngayah.

Tata cara ngadegang Prajuru Desa

Pawos 20

- (1) Tata cara ngadegang Prajuru Desa :
 - ha. *Soang Banjar dados ngusulang 1 (siki) calon bendesa mawiwit saking krama wedan sane sampun mayusa sekiranya 45 warsa, naenin dados prajuru banjar utawi prajuru desa.*
 - na. Kawentanang prawartaka pemilihan, kamanggalanin antuk Prajuru Desa sane lawas, kawantu olih kelian / prajuru banjar sane kasudi.
 - ca. *Calon saking prajuru banjar kaselehin antuk prawartaka, raris kapastikayang dados calon bendesa.*
 - ra. *Pemargi pemilihan jagi kemargiang manut kaputusan paruman.*
 - ka. Pamilihan kamargiang ring wantilan pura desa lan puseh, soang-soang kelihan banjar patut nitenin lan nureksain pemargi pamilihan bendesa inucap
 - da. Calon sane kacawis paling makweh sane jayanti.
 - ta. Bandesa wenang nyudi pangabihnyane.

- (2) *Prajuru Desa kaadegang 5 warsa apisan olih Paruman Paripurna Desa Adat, tur kakukuhang sanistane oleh Manggala Majelis Alit.*
- (3) Prajuru sané wawu kapilih kaupasaksiang ring Pura Kahyangan Tiga Désa.
- (4) Sajawaning wénten pariindikan sios, sang sampun puputing panumaya dados Prajuru, kéngin kapilih malih.
- (5) Prade Kelian Desa Adat / Bendesa Adat mararyan, sadurung panumayan ipun, swadarmannya, kamargiang olih penyarikan nyane jantos puput panumaya.

Pawos 21

- (1) Ritatkala ngemargiang kasukertan Desa Adat, Bandésa kawantu olih :
 - ha. Patajuh, pinaka Wakil Bandésa.
 - na. Panyarikan, pinaka Juru Surat.
 - ca. Patengen, pinaka Pangemong Druwén Désa.
 - ra. Kelihan-kelihan Banjar sawewidangan Désa Adat Kerobokan.
 - ka. Kasinoman pinaka Juru Arah ring sowang-sowang Banjar.
 - da. Pecalang sane nreptiang pemargi ritatkala wenten karya adat lan agama hindu.
 - ta. Prajuru ring soang-soang Pura Desa, Puseh, Dalem lan Petitenget.
 - sa. Sabha Pinandita.
 - wa. Widya Sabha lan Tapini Desa.
 - la. Panureksa druwen desa.
- (2) Ritatkala ngénterang kasukertan ring niskala, Bandésa patut masinggihang Pamangku Kahyangan Tiga.
- (3) Indik tata titi ngadegang pecalang, swadarman lan patitis ipun, manut pararem.

Pawos 22

- (1) Swadharma Bandésa, inggih punika :
 - ha. Ngénterang paruman-paruman Désa Adat.
 - na. Ngénterang panglaksanaan sadaging Awig-awig miwah pamutus-pamutus Krama Désa, sané sinanggeh Pararem.
 - ca. Ngraksa miwah nudonang tata-titiné migunayang arta brana druwén Désa.
 - ra. Nuntun saha ngénterang Krama Désa rawuhing warga Désa sami, ngupadi kasukertan sekala lan niskala.
 - ka. Nuntun saha nyaksi upacara sangskaraning kahuripan sané mabuat.

- da. Nuntun saha ngénterang Warga Désa, nginggilang Sang Hyang Àgama, kasucian Kahyangan, kasucian Palemahan, kasucian Pawongan, miwah tata-titiné migunayang Sétra.
 - ta. Mawosin miwah niwakang pamutus marep ring wicàra krama.
 - sa. Ngwakilin Désa Adat, matemuang bebawos ring sapisira ugi.
 - wa. Lan sané séwosan sané wénten pakilitannya ring Désa Adat.
- (2) Tata-titiné nglaksanayang swadharma inucap ring ajeng, tan maren patut satinut ring daging Awig-awig, Pararem, dresta miwah Pamutus Paruman Krama Désa Adat.
 - (3) Panglaksanané ring ajeng patut kasiarang ring Désa Adat, kapungkuripun.
 - (4) Sumakuta utawi sumanggup natak Pamutus Paruman Krama Désa Adat, ngeninin swadharman sowang-sowang Prajuru.

Pawos 23

Swadarma Petajuh inggih punika ngewantu Bendesa ring widang Parhyangan, Pawongan lan Palemahan.

Pawos 24

Swadarma Panyarikan inggih punika ngewantu bandesa ngaryanin saluir sewalapatra, nyatet inventaris desa tur nyuratang saluiring pamutus pangerawos desa ring sangkepan,

Pawos 25

Swadarma Patengen inggih punika ngewantu bandesa ngaryanin utawi ngerincik sakaluwir pangeranjing miwah pamedal jinah desa Desa Adat lan ngupapira druwen desa,

Pawos 26

Swadarma Kesiroman Desa, ngewantu bandesa nyobyahang sualapatra utawi pamutus pengerawos desa ring tempekan desa.

Pawos 27

Swadarma Pasayahan inggih punika ngewantu Bandesa ring sajeroning nata Parhyangan, Pawongan lan palemahan mangde tetep asri.

Pawos 28

Swadarma Pacalang Desa ngewantu Bandesa nreptiang pamargin upakara yadnya, dharmaning Agama lan Dharmaning Negara.

Pawos 29

Patias utawi olih-olihan lan leluputan Pamucuk Désa Adat, manut Pararem.

Pawos 30

- (1) Wusan dados Pamucuk Désa Adat, sangkaning :
 - ha. Lina.
 - na. Pinunas ngraga.
 - ca. Swadharmanya sampun puputing senger.
 - ra. Kawusanang / kanorayang olih Krama Désa duaning iwang pamargi, menawi nilar sesana.
- (2) Ngentosin, ngwusanang utawi nganorayang Pamucuk Désa Adat, patut kamargiang risajeroning Paruman Agung Désa Adat.

Palet 3

Indik Kulkul

Pawos 31

- (1) Dudonan Kulkul ring Désa Adat Kerobokan, inggih punika :
 - ha. Kulkul Désa magenah ring Pura Désa.
 - na. Kulkul Bañjar magenah ring sowang-sowang Balé Banjar.
 - ca. Kulkul Sekaa-sekaa.magenah ring banjar.

- (2) Kulkul Désa / Bañjar Adat, kamanggehang pinaka piranti utawi sarana tengeran maka wangsit, ring wewengkon wewidangan Désa / Bañjar Adat.
- (3) Kulkul Désa / Bañjar Adat, tan wenang katepak yan tan manut kadi daging awig-awig puniki :
 - ha. Tengeran upacara yadnyan Désa utawi Bañjar.
 - na. Tengeran wénten sinalih tunggil Warga Désa kalayusekaran.
 - ca. Tengeran ngawit nglaksanayang pakaryan sakadi sané sampun kaarahang utawi kasiarang.
 - ra. Tengeran Sangkep Désa utawi Bañjar.
 - ka. Tengeran wénten sinalih tunggil Krama Désa kamalingan;
 - da. Tengeran wénten sinalih tunggil Krama Désa kaamuk, kabégal, utawi bhayapati siosan.
 - ta. Tengeran wénten sinalih tunggil Warga Désa mawiwaha.
 - sa. Tengeran siosan manut dresta.
- (4) Kulkul Désa / banjar tan wenang katepak sajawaning mula wantah tengeran sané patut katiwakang ring Krama Désané sami, upami : Yadnya Désa, Paruman / Pakaryan Krama Désa miwah bhayapati.
- (5) Suaran tetepakan kulkul inucap nganutin tengeran sahanan Yadnya, kalayusekaran, pawiwahan, pañcabhaya, miwah sané siosan sakadi ring sor puniki :
 - ha. Suaran kulkul atuludan lambat, tengeran tedun ngayah wiadin parum.
 - na. Suaran kulkul bulus, tengeran kapañcabhaya, minakadi kamalingan, kabégal, kaamuk, bhayapati, miwah bhaya siosan.
 - ca. Suaran kulkul nguntit, tengeran wénten genibhaya.
 - ra. Suaran kulkul limang kelentungan lambat, tengeran wénten pawiwahan.
 - ka. Suaran kulkul tigang kelentungan lambat, tengeran wénten kalayusekaran.

Pawos 32

- (1) Kulkul Désa / Bañjar Adat, tan wenang katepak yan tan sangkaning pituduh Prajuru, sajawaning tengeran kapañcabhayan.
- (2) Sang nepak Kulkul Désa / Banjar Adat, tan sangkaning pituduh Prajuru, patut digelis atur supéksa maka buatan panepaké; yan piwal, sang mamurug wenang katibakin danda, manut Pararem.

- (3) Kulkul Sekaa-sekaa miwah kulkul pondokan-pondokan, tan kalugra nyawerin utawi matehin sukat miwah tetepakan Kulkul Désa / Bañjar Adat; pradé mamurug, sang mamurug taler wenang katibakin danda, manut Pararem.
- (4) Sahananing Kulkul Bañjar sawewidangan Désa Adat Kerobokan, patut sareng katepak pradé wénten sinalih tunggil Kulkul Bañjar, nyihnayang wénten kapañcabhaya.

Pawos 33

- (1) Suaran kulkul tengeran makarya, patut katedunin antuk ayahan manut daging dedawuhan utawi sesiar.
- (2) Suaran kulkul tengeran pañcabhaya, patut katedunin antuk sahanan krama rawuhing truna, saha makta gegawan pamitulung, manut rupan bhayané.

Palet 4

Indik Paruman

Pawos 34

- (1) Dudonan Paruman ring Désa Adat Kerobokan, luwiré :
 - ha. Paruman Krama Désa inggih punika paruman sane kemargiang padgatakala ritatkala wenten pikobet utawi karya ring Desa Adat Kerobokan.
 - na. Paruman Paripurna inggih punika paruman sane kemargiang a warsa ngindikang pemargi ring Desa Adat Kerobokan.
 - ca. Paruman Krama Banjar.
 - ra. Paruman Prajuru, kawéntenang ritatkala ngriñcikang pamargi-pamargi lan utsahan-utsahan Désa Adat.
 - ka. Paruman Sekaa-sekaa.
- (2) Sane patut ngamiletin paruman krama desa lan paruman paripurna wantah prajuru banjar, seantukan gebogan desa makweh pisan, paruman wawu kéngin kakawitin sasampuné katedunin antuk pinih kedik atenga lintang, mabusana adat Bali (nyelémpot), tan kalugra makta gegawan sakaluwiré, karihinin antuk ngarcana Bhagawàn Panyarikan, majalaran widhi widhana lan cané.
- (3) Maka pangawit, kalaksanayang panyacah pangesép, wawu kalanturang antuk parum.

- (4) Sajeroning paruman tan kalugra ngwetuang wak ghora minakadi ngardi biota, sang mamurug wenang keni pamidanda bea pacamil, sané kasulurang manut Pararem.
- (5) Pamutus bebawos sané briuk sapanggul utawi ingkup, punika sané kaaptiang tur kamanggehang, pradé nénten prasida, suarané makéhan sinanggeh Pamutus Paruman.
- (6) Paruman Désa wenang ngamedalang pararem-pararem, maka pamitegep panglaksanaan awig-awig.

Pawos 35

- (1) Paruman Krama Désa, kawéntenang sanistannya 3 sasih apisan utawi padgatakala manut kabuatan.
- (2) Paruman Paripurna kawentenan a warsa apisan.
- (3) Paruman Prajuru, kawéntenang manut tatujon.
- (3) Paruman Krama Banjar, kawéntenang manut banjar suang suang.
- (4) Paruman Sekaa-sekaa, kawéntenang manut kabuatan.

Pawos 36

- (1) Sajeroning Paruman Désa, Bendésa patut nyiarang pamarginé ngénterang Désa, pamekas ngeninin indik :
 - ha. Muñjuk lungsuring gebogan Adat saha ayah-ayah nyané.
 - na. Indik panelas prabea Yadnya, wewangunan, miwah sané lianan, pamekas indik sulur artha brana druwén Désa.
 - ca. Pamargin utsahan-utsahan Désa sané mabuat.
 - ra. Sahanan wicara saha pamutus-pamutusnyané.
 - ka. Daging pararem-pararem miwah pasuara-pasuara sané mabuat.
 - da. Pangreñcanan Prajuru, ngeninin utsahan Désané kapungkur.
 - ta. Miwah sané lianan.
- (2) Sahanan sesiar Bendésa ring ajeng patut katiténin saha katiwakin pamutus antuk Paruman Désa.
- (3) Pamutus Paruman Désa inucap ring ajeng patut katinutin antuk Krama Désa sami, pamekas antuk Prajuru.

Pawos 37

- (1) Paruman-paruman inucap patut katuntun antuk Bendésa.
- (2) Sahanan Prajuru Désa, wenang tur patut nyarengin Paruman Prajuru Désa.
- (3) Paruman Prajuru Désa Adat, kawenangang wantah ngrincikang pangreñcana marep ring kabuatan Désané kapungkur.
- (4) Paruman Prajuru Désa Adat, tan kawenangang ngamedalang tetegenan ring Krama Désa, sadéréngé kaingkupin antuk Krama Désa.

Pawos 38

- (1) Paruman Prajuru taler wenang ngamedalang pasuara-pasuara maka pamitegep panglaksanaan awig-awig.
- (2) Daging pasuara tan maren patut :
ha. Manut pituduh sang ngawa ràt.
na. Utawi manut pamutus sané pecak sampun dados pararem Krama Désa.

Palet 5

Indik Druwén Désa

Pawos 39

- (1) Sané kamanggehang dados druwén Désa Adat Kerobokan luwiré :
ha. *Pura Desa, Pura Puseh, sane magenah ring wates wawengkon Banjar Petingan.*
na. Pura Dalem Kahyangan :
 1. Dalem kahyangan Kerobokan magenah ring wawengkon Banjar Batubidak.
 2. Dalem kahyangan Dukuh magenah ring wawengkon Banjar Dukuhsari
 3. Dalem kahyangan Banjar Anyar magenah ring wawengkon Banjar Anyar Kelod.
 4. Dalem kahyangan Batubelig magenah ring wawengkon Banjar Batubelig.
 5. Dalem kahyangan Umaduwi magenah ring wawengkon Banjar Umaduwi.
 6. Dalem kahyangan Kayu Aya magenah ring wawengkon Banjar Basangkasa.
 7. Dalem kahyangan Robokan magenah ring wawengkon Banjar Robokan.
 8. Dalem kahyangan Teges magenah ring wawengkon Banjar Teges.

- ca. Pura Tungkub Kahyangan.
 - ra. Pura Mrajapati.
 - ka. Tanah Sétra sane magenah ring banjar manut aksara na ring ajeng.
 - ra. Tanah pelaba pura desa akehnyane 8,5 Ha, magenah ring subak Sebuah.
 - da. Bale Agung, Bale Gong, Wantilan lan Bale Kulkul.
 - sa. LPD.
 - wa. Palinggih Pan Balang Tamak.
 - ma. Palinggih Sri Sedana.
- (2) Sakaluwiring druwén Désa patut wénten Likita sané pastika.
- (3) Tan kalugra ngadol utawi ngésahang druwén Désa / pura yan tan kacumponin antuk Krama Désa sami.

Pawos 40

- (1) Olih-olihan Désa Adat Kerobokan , mawit saking :
- ha. Paturunan saking Krama.
 - na. Paica saking Guru Wisésa.
 - ca. Pah-pahan sesari saking petirtan ring Kahyangan Tiga.
 - ra. Dana punia tiyosan sané patut.
 - ka. Pah-pahan saking LPD.
- (2) Sanangken Paruman Krama Désa, Bendésa patut nyiarang muñjuk lungsur sapanunggalannya sané sinanggeh druwén Désa.
- (3) Sahanan olih-olihan inucap ring ajeng sané sinanggeh druwen Désa, kaanggén prabéa piodalan miwah wewangunan ring pura, taler prabéa siosan marep ring kabuatan Désa Adat.

SARGAH PAT SUKERTA TATA AGAMA

Palet 1

Indik Déwa Yadnya.

Pawos 41

- (1) Pura Dang Kahyangan, Pura Kahyangan Tiga, pura amongan desa, pura / palinggih panyiwian Krama Désa Adat Kerobokan, luwiré :

- ha. Kahyangan amongan krama Desa Adat.
1. *Pura Desa / Bale Agung Kerobokan.*
 2. *Pura Puseh Kerobokan.*
- na. Pura Dalem Kerobokan, kasungsung olih.
1. Banjar Batuculung.
 2. Banjar Babakan.
 3. *Banjar Beluran.*
 4. Banjar Gadon.
 5. Banjar Silayukti.
 6. Banjar Batubidak.
 7. Banjar Jambe.
 8. Banjar Petingan.
 9. Banjar Gede.
 10. Banjar Tegeh.
 11. Banjar Kancil.
 12. Banjar Kesambi.
 13. Banjar Muding Mekar.
 14. Banjar Muding Kelod.
 15. Banjar Muding Tengah.
 16. Banjar Mudiag Kaja.
 17. Banjar Tegehsari.
 18. Banjar Lembang.
 19. Banjar Pengubengan Kauh.
 20. Banjar Pengubengan Kangin.
- ca. Pura Dalem Dukuh kasungsung olih :
1. Banjar Campuan.
 2. Banjar Padang.
 3. *Banjar Peliatan.*
 4. Banjar Dukuhsari.
 5. Banjar Semer.
 6. Banjar Kuwum.
 7. Banjar Umalas Kauh.
 8. Banjar Umalas Kangin.
 9. Banjar Umasari.
 10. Banjar Taman.

11. Banjar Taman Mertanadi.
- ra. Pura Dalem Banjar Anyar kasungsung olih :
 1. Banjar Anyar Kaja.
 2. Banjar Anyar Kelod.
- ka. *Pura Dalem Batubelig kasungsung olih :*
 1. *Banjar Batubelig.*
 2. *Banjar Batubelig Kangin.*
- da. Pura Dalem Umaduwi kasungsung olih :
 1. Banjar Padang Sumbu Kaja.
 2. Banjar Padang Sumbu Tengah.
 3. Banjar Padang Sumbu Kelod.
 4. Banjar Umaduwi.
 5. Banjar Tegallantang Kaja.
 6. Banjar Tegallantang Kelod.
 7. Banjar Jabapura.
 8. Banjar Batubolong.
 9. Banjar Pengipian.
- ta. Pura Dalem Robokan kasungsung olih :
 1. Banjar Robokan.
 2. Banjar Umaklungkung.
- sa. Pura Dalem Teges kasungsung olih :
 1. Banjar Teges.
 2. Banjar Tegalbuah.
 3. Banjar Abasan.
- wa. Pura Dalem Kayu Aya kasungsung olih : Banjar Basangkasa.
- la. *Pura Petitenget lan Ulun Tanjung.*
- (2) Tegak piodalan ring sowang-sowang kahyangan inucap ring ajeng, kamanggehang sakadi ring sor puniki :
 - ha. Pura Desa/Puseh Kerobokan, nyabran Rahina soma kliwon wuku Kuningan, Pemacekan Agung.
 - na. Dalem kahyangan Kerobokan rahina Sukra, paing wuku Dungulan.
 - ca. Dalem kahyangan Dukuh rahina Sukra, paing wuku Dungulan.
 - ra. Dalem kahyangan Banjar Anyar rahina Sukra, paing wuku Dungulan.
 - ka. Dalem kahyangan Batubelig ring Tilem Sasih Karo.
 - da. Dalem kahyangan Umaduwi rahina Buda, Umanis wuku Medangsia.

- ta. Dalem kahyangan Kayu Aya rahina Buda, Wage wuku Ukir.
 - sa. Dalem kahyangan Robokan rahina Sukra, Paing wuku Pahang.
 - wa. Dalem kahyangan Teges rahina Buda, Umanis, wuku Dukut.
 - la. *Pura Petitenget, rahina Buda Wage Merakih.*
 - ma. *Pura Ulun Tanjung, rahina Purnama sasih Kapat.*
- (4) Pamargin pangaciné ring sowang-sowang Pura / palinggih ring ajeng, manut kecap sastra agama, dresta saha kalaksanayang kanista, madhyama, lan utama.
 - (5) Nemonin rerahinan jagat, krama Desa Adat Kerobokan patut ngawentenana upacara lan upakara manut sastra, dresta sane sampun ketah ring Desa Adat Kerobokan minakadi : Soma Ribek, Pagerwesi, Sugihan, Galungan, Kuningan, Tumpek, Saraswati, Nyepi, Purnama, Tilem, Anggara Kasih, Kajeng Kliwon, Budha Cemeng, Ciwa Latri.
 - (6) Ritakala rerahinan jagat, utawi pawarah saking angawa rat, krama desa kepatutan memenjor.
 - (7) Ring Desa patut wenten caru pemahayu jagat inggih punika :
 - ha. *Pesamuan hidangan / caru tumpek wayang, ring jaba sisi Pura Desa lan Puseh Kerobokan.*
 - na. *Caru/Palelaban ring pemangkalan setra nemoning sasih kapitu.*
 - ca. Caru sane tiosan manut dresta lan pararem banjar.
 - ra. Caru godel selem batu ring Pura Petitenget nemoning Tilem Kaulu.
 - da. Caru sampi biang belang kebang ring Pura Masceti Ulun Tanjung rikalaning Purnama Kasanga.

Pawos 42

- (1) Rikala nglaksanayang piodalan utawi karya, sadéréng ngamargiang kramaning sembah, patut kerihinin antuk Puja Tri Sandhya.
- (2) Rikalaning piodalan ring Parhyangan sane dados penyungsung Desa, wenang Krama Desa lanang istri pedek maaturan ke Parhyangan punika, sajawaning medaging kacuntakan.
- (3) *Tan wenang madolan ring palemahan pura, yan ana amurug wenang kadanda agung artha manut Pararem.*
- (4) Ritakala piodalan ring parhyangan, wenang sang sane ngeranjing ke Pura nganutin tata cara inggih punika :
 - ha. Lanang – lanang , awastra, akampuh, asabuk, adestar.

na. Istri – istri, awastra, akampuh, maubed-ubed utawi selendang wiyadin masenteng.

Pawos 43

Indik Pamangku

- (1) Ring sowang-sowang pura inucap ring ajeng, patut kaadegang Pamangku.
- (2) Pidabdabé ngadegang Pamangku, nganutin dudonan :
 - ha. Ngwilang saking turunan utawi ngwaris.
 - na. Malantaran nyanjan utawi nuhur ring pura sané karerehang Pamangku.
 - ca. Malantaran kapilih antuk Krama Désa.
 - ra. *Adiksa Widhi kemargiang lanang lan istri.*
- (3) Sang tan wenang kaadegang dados Pamangku, luwiré :
 - ha. Cédàngga, inggih punika : pécéng, pérot, cungh lan sapanunggalilannya.
 - na. Sapasira ugi sané nénten kapatutang manut pararem.
 - ca. Nandang sakit ila, ayan, buduh miwah pasungkan sané tan sida katambanin.
 - ra. Sang maderbé parilaksana nénten becik.
- (4) Prabéa Kapamangkuan :
 - ha. Prabéa adiksa widhi utawi ngwintenang Pamangku kamedalin miwah kalaksanayang antuk sang ngadegang, makadi Krama Désa utawi pangempon pura *sowang-sowang*.
 - na. Mapitra yadnya riwekas, prade kulawarga pamangku tan mrasidayang, patut sungkemin antuk krama desa utawi pangemong, sanistannya Brahma prayascita wiadin panyanggrane nganut pararem prade yadnya kalaksanayang antuk wargan sira mangku.
 - ca. Marep ring prabéan pitra Yadnya ring Pamangku, yan séda riwekas, sang sane ngadegang utawi Krama Désané patut mawéh dana punia atiwa-tiwa, manut Pararem.
- (5) Pamangku, patut ngamanggehang sesana miwah agem-ageman Pamangku.

Pawos 44

Swadharmaning Pamangku luwirnya:

- (1) Ngénterang upacara piodalan ring kahyangan sané kaempon utawi ring pakubon sowang-sowang krama, tur mangda mabusana sarwa putih lan madestar mabongkos.
- (2) Ritatkala piodalan ring Kahyangan Tiga, Pamangku-pamangku Pura Parasanak / Dadia / banjar, dados ngaturang ayah manut pituduh pamangku kahyangan tiga.
- (3) Pradé sinalih tunggil Pamangku Kahyangan Désa kapialang utawi cuntaka, Pamangku sané ngabih utawi Pamangku tiosan, kengin ngamargiang sané patut kalaksanayang olih Pamangku sané kapialang utawi kapiambeng punika.
- (4) Yan Pamangku sampun tigang rahina ngayah ring pura, kancit wénten kulawaragannya kalayusekaran, Pamangku inucap tan kenéng cuntaka, sakéwanten nénten kengin budal salamin piodalan.
- (5) Mungguh tedun ring palinggih-palinggih Kahyangan Désa miwah ngiyasin pralingga-pralingga.
- (6) Tan wenang salab sulub, yang mamurug wenang pamangku inucap nunas panyapuhan.
- (7) Pamangku kahyangan desa wenang nibakang tirta manut Pituduh prajuru desa.

Pawos 45

Patias utawi olih-olihan Pamangku, luwiré :

- (1) Polih asiki saking pah tiga sesari.
- (2) Luput pakaryan miwah luput papeson sane lianan manut pararem.

Pawos 46

- (1) Pamangku kagentosin, riantukan :
ha. Séda.
na. Pinunas ngraga, menawi kageringan lan sapanunggilannya.
ca. Kawusanang antuk Krama, riantukan nilar sesanan Pamangku.
- (2) Prade Pamangku kawusan sangkaning malaksana asta dusta, keni pamidanda manut Pararem, saha ngewaliang prabeya pawintenan nguni.

Pawos 47

Indik kasukertan Kahyangan, kadudonang sakadi ring sor puniki :

- (1) Sané nénten kalugra ngranjing ka Pura, luwiré :
 - ha. Sang katiban cuntaka, minakadi sebel ngraga :
 1. Sebel kandel ngrajaswala, salami dérég mabresih.
 2. Sebel antuk ngembasang putra, salami 42 rahina, pateh ring sang karuron.
 3. Sebel panganténan, sadéréng mabiakala utawi makala-kalaan.
 4. Sebel riantukan kalayusekaran, manut sengker.
 - na. Makta sahananing bebaktan sané sinanggeh ngletehin, manut kecap sastra agama.
 - ca. Sato agung minakadi wewalungan suku pat, sajawaning rikala mapepada.
 - ra. Anak alit sadéréng mayusa tigang sasih.
 - ka. Mabusana sané tan manut kadi tatacaraning ngranjing ka pura, sadéréng polih wak-wakan utawi pituduh saking Prajuru Désa Adat.
- (2) Tata busanané ngranjing ka pura, kasulurang manut Pararem.
- (3) Pratingkahé tan wenang ring Pura, luwiré :
 - ha. Masumpah utawi macoran, sajawaning wit saking pituduh Prajuru Désa Adat utawi Pararem Désa.
 - na. Ngamedalang wak parusia, minakadi mamisuh, marebat, majaljal, mabawos banggras sané ngwetuang iyeg lan sakancan punika.
 - ca. Mabanyu, makoratan, masesenengan, makolem dados asiki lanang wadon, nyangsang busana.
 - ra. Ngias raga minakadi menahang wastra, menahang pusungan lan sakancan punika, sajawaning sang sulinggih miwah pinandita.
 - ka. *Masusuin anak rare.*
 - da. Mungguh tedun palinggih.
- (4) Séwosan ring Pamangku tan kalugra mungguh tedun ring palinggih-palinggih, sajawaning wit pituduh saking Prajuru Désa Adat.
- (5) Sang mamurug kecapé ring ajeng, wenang keni pamidanda, manut Pararem.

Pawos 48

- (1) Yan wénten jadmá karawuhan ring pura boya sangkaning nyanjan tur ngawinang kramané biapara, wenang keni pamidanda, manut Pararem.
- (2) Pradé Kahyangan Désané kahanan durmanggala minakadi kapancabhayan, Pamangku patut digelis masadok ring Prajuru Désa Adat.
- (3) Indik upakara/upacara pamahayun kadurmanggalan Kahyangan Désa, mapagamel kecap sastra agama, sané kasungkemin olih Krama Désa.

Palet 2

Indik Resi Yadnya.

Pawos 49

- (1) Sang pacang madeg sulinggih utawi madwijati patut masadok ring Prajuru Désa Adat miwah Parisada Dharma Hindu Bali / Parisada Hindu Dharma Indonesia.
- (2) Prajuru Désa Adat patut niténin tur wenang mialangin, pradé kacihnán wénten indik sané tan manut kecap sastra agama, tur sareng nyaksi upakara/upacara padwijatiannya, saha nglantur nyiarang sajeroning Paruman Krama Désa tegap rauhing wates kawenangannya muput Yadnya.
- (3) Krama Désa patut madana punia sapamadeg miwah ring panglepas Sang Sulinggih riwekas, katuntun antuk Prajuru Désa.
- (4) Sang Sulinggih wenang polih leluputan ayahan miwah peson-peson.

Pawos 50

- (1) Sajeroning muput Yadnya, Sang Sulinggih patut ngutamayang muput Yadnya ring wewengkon Désa Adat Kerobokan, sasampuné puput, wawu muput Yadnya ring wewengkon désa tiosan utawi ka dura désa.
- (2) Krama Désané sami, patut patriyaksa lan niténin, katuntun antuk Prajuru, mangda sahanan Yadnya sané kalaksanayang olih sowang-sowang Krama Désa, kapuput olih Sulinggih utawi Pinandita, manut kawenangannya sowang-sowang.

Palet 3
Indik Pitra Yadnya.

Pawos 51

Dudonan pamargin pitra yadnya:

- (1) Pangupakaran sang seda luwirnya :
ha. Mendem utawi ngeseng, makacihna pakingsan ring ibu pertiwi utawi ring Bathara Brahma.
na. Pangabenan utawi palebon.
- (2) Upacara pitra yadnya riwusan pangabenan utawi palebon kemargiang ngeroras / mamukur, kelanturang ngalinggihang dewa pitara.
- (3) *Banjar Adat wewidangan Desa Adat Kerobokan, patut sareng nyanggra yan wénten sinalih tunggil krama sané nglaksanayang upacara Pitra Yadnya jantos puput.*
- (4) *Indik panyanggrannyané kasulurang manut awig banjar.*
- (5) *Sang pacang nglaksanayang upacara Pitra Yadnya minakadi kalayusekaran, mangda masadok ring Prajuru Banjar lan Prajuru Desa.*
- (6) *Pemargin sawa saha upakara ke setra patut mangda dabdab tur antar, tan kengin masuara gora (megarap-garapan) yan ana mamurug, keni pamidanda manut pararem.*

Pawos 52

- (1) Sinalih tunggil Krama Desa Adat Kerobokan yang katekaning pralaya, wenang mendem / ngeseng / palebon ring Setra sane wenten ring wewidangan Desa Adat Kerobokan.
- (2) Yan *wenten* krama tamiu kapadgatakala kadadosang wantah ngeseng utawi makingsan lan palebon ring Setra tamiu Dalem Kerobokan manut *dresta Desa Adat Kerobokan* tata cara agama Hindu Bali, sang sane madruwe karya ngaturang penanjung batu ke Desa Adat kwehnya manut pararem.
- (3) Yan *wenten* krama saking dura desa palebon, sakewanten *layon* wiadin pangupakaranya kalaksanayang ring setra wewengkon Desa Adat Kerobokan, wenang ngaturang jinah pananjung batu kwehnya manut pararem.
- (4) Yan *wenten* krama saking dura desa ngiring utawi matempung palebon ring Desa Adat Kerobokan, wenang sang kairing utawi sang katempungin punika ngaturang jinah pananjung batu ke Desa Adat Kerobokan, kwehnya manut pararem.

- (5) Tan wenang sinalih tunggil krama desa, mendem *layon*, angentas *layon*, angeseng *layon* ring sawewengkon Desa Adat Kerobokan rikalaning rahina :
- ha. Semut sedulur.
 - na. Kala gotongan.
 - ca. Prawani, Tilem, Purnama.
 - ra. Makirim *layon* (ngurut ping kalih a rahina ngutang *layon* ke setra).
 - ka. Piodalan/Ida Batara kantun ngadeg/nyejer.
 - da. *Ngelangkungin layon*.
 - ta. Rerahinan jagat.
 - sa. Makajang *layon* (ngukul apisan nanging ping kalih ngirim *layon* kesetra).
 - wa. Wuku buncal balung.
 - la. Rahina tiosan manut dresta/pituduh saking guru wisesa.
- Yan wenten mamurug*, wenang banjar sane ngarepin kadenda, makwehnya manut pararem.
- (6) Tan nganutin dewasa becik : Redite umanis (Sang Hyang agni tan kayun ngeseng), Redite pon Julungwangi, *Anggara Kasih Medangsia* (pitra nuju kawah geni), Anggara Ludra (pitra nebeng geni), Purwaning dina (soma wage), Purwaning dina (Anggara Kliwon lan Soma Wage), Tanggal pangelong ping 8, 14, Sasih tan becik (6,7,8,9 11,12), Pasah, *Anggara Pon Klawu*, Budha Wage, Budha Kliwon, Tumpek (Saniscara Kliwon), Budha Pon tanggal ping 9 (sedina pejah), Budha Pon pangelong ping 9 (goak nunggu setra), Rahina medaging (Biyantara, kliwon, kingkarbala ngadang), rahina nuju yama kala, wuku tan wenang (dungulan, kuningan, langkir, pujut), anggara kliwon medaging dora (sang nibeng dewasa neraka), dewasa apit pada, ingkel wong.
- (7) Yan *layon* rare durung maketus, wenang mendem ring rahina sekadi ring ajeng *palihan* (6) *tan kakeniang* pamidanda.
- (8) Tan kalugra nginepang bangbang.
- (9) Désané mawéh galah ring sang kalayusekaran sajeroning pitung rahina kengin atiwa-tiwa, sawawaning wénten kabuatan tios saking sang yajamana.

Pawos 53

- (1) Sang lampus salah pati, *ngulah pati*, minakadi anyud, kelem lan sapanunggilannya, dados kabuat budal tur kapratéka sakadi patuté, sakéwanten kamanggala antuk upacara panebusan lan pangulapan, wawu polih panyanggran Désa.

- (2) Yan wénten jadmā istri padem tur kantun ngadut manik, tan wenang kapendem sadéréng bobotannya embas, manik punika patut *kaembasang* rihin utawi *majalaran* antuk operasi olih dokter.
- (3) Yan wénten jadmā padem ring wewidangan Désa Adat Kerobokan, tur tan keni antuk ngélingin, patut kaatur uningayang ring Sang Maraga Guru Wisésa.

Pawos 54

- (1) Yéning sinalih tunggil krama nyukserahang karya pangabénan : utama, madhyama, kanista, ring Désa, indik sengkernya mangda kunadika antuk Prajuru.
- (2) Tan dados ngutang *layon* meped miwah ngapuanang.
- (3) Tan dados nglangkar *layon* ring Banjar tunggal margi ka sétra, sadurung wénten upakara pamelas margi.

Pawos 55

- (1) Nyabran 3 (tigang) warsa nyantos 5 (limang) warsa Desa Adat Kerobokan ngemargiang palebon masal (ngerit) ring soang-soang Pura Dalem.
- (2) Kalugra ngemargiang pangabenan pangeritan, sareng pasikian, dadia, wargi, desa, banjar kakeniyang pacingkreman manut pararem.
- (3) Wong dura desa sane nyarengin palebon *ngerit* kakeniyang pacingkreman manut pararem.

Pawos 56

- (1) Désa Adat Kerobokan, ngamanggehang indik cuntaka, mapagamel ring Pamutus Mahasabha Parisada Hindu Dharma Indonésia.
- (2) Tatacarané nyulurang kacuntakan, mapagamel kecap sastra agama, kaanutang ring drestan désa, sané kaingkupin jeroning Pararem.
- (3) Sinalih tunggil krama sané kahanan cuntaka, yan durung *buntas*, tan kalugra nyarubin genah suci druwén Désa miwah druwén sowang-sowang krama.
- (4) Sengker cuntaka manut kawéntenannya, kasulurang sakadi ring sor puniki :
 ha. Kalayusekaran, cuntakannya kaanutang ring drestan désa miwah sastra dresta.
 na. *Ngrajaswala, cuntakannya tigang rahina ngawit saking ngrajaswala, utawi salamin ngrajaswala, turmaning kadulurin antuk makramas.*

- ca. Ngembasang putra, abulan pitung rahina ngawit saking putrané embas, ngantos katiwakin upakara/upacara tutug kambuhan.
- ra. Karuron, cuntakannya abulan pitung rahina ngawit saking karuron, ngantos katiwakin tirtha pamrayascitta.
- ka. Pawiwahan, cuntakannya ngantos sampun makala-kalaan.
- da. Gamia gamana, cuntakannya ngantos sampun kapalasang, karuntutin antuk mrayascitta sikian, Désa Adat miwah Kahyangan Désa.
- ta. Salah timpal, cuntakannya kapuputang manut kecap sastra agama miwah *dresta* désa.
- sa. Anak istri mobot malantaran lokika sanggraha kandugi nénten katiwakin upakara/upacara pabiakawonan, cuntakannya ngantos katiwakin upakara/upacara pabiakawonan.
- wa. Anak istri ngembasang putra malantaran lokika sanggraha kandugi pecak nénten katiwakin upakara/upacara pabiakawonan miwah widhi widhana, cuntakannya ngantos wénten meras anaké alit, karuntutin antuk upakara/upacara manut kecap sastra agama.
- la. Mamitra ngalang, cuntakannya ngantos katiwakin upakara/upacara pabiakawonan.
- ma. *Maparilaksana Sad àtatàyi*, cuntakannya ngantos sampun mrayascitta sikian miwah ngeséhin prawreti. *Risampune Paripurna pamidandannya saking Guru wisesa.*

(6) *Cuntaka kalayusekaran :*

- ha. Kapendem, cuntakannya :
 1. Cuntaka ka Banjar, laminnyane tigang rahina ngawit saking wusan mendem, utawi ngantos sampun maprayascitta (masepuh);
 2. Kulawargannya sajeroning pakarangan manut dresta.
- na. Kaabénang, cuntakannya :
 1. Cuntaka ka Banjar, manut dresta sané kapikukuhin antuk Pararem Banjar.
 2. Cuntakan sang nyambut karya pitra Yadnya, manut dresta sané kapikukuh antuk Pararem Banjar.

(7) *Sang katiban cuntaka, luwiré :*

- ha. Kalayusekaran, sané cuntaka :
 1. Sang kalayusekaran.
 2. Kulawargannya.
 3. Bebanjarannya.

- na. *Ngrajaswala, sané cuntaka : sang ngrajaswala.*
- ca. Ngembasang putra, sané cuntaka : sang maderbé putra (*lanang wiadin istri*), utawi yayah rénan sang wawu embas.
- ra. Pawiwahan, sané cuntaka : sang mawiwaha lanang wiadin istri, utawi dampati lanang istri.
- ka. Karuron, sané cuntaka : sang karuron rawuhing lanangnyané.
- da. Gamia gamana, sané cuntaka :
 1. Sang nglaksanayang gamia gamana.
 2. Banjar Adatnyané.
- ta. Salah timpal, sané cuntaka :
 1. Sang nglaksanayang salah timpal.
 2. Banjar Adatnyané.
- sa. Anak istri mobot malantaran lokika sanggraha kandugi pecak nénten katiwakin upakara/upacara pabiakawonan, sané cuntaka : anaké istri sané mobot punika.
- wa. Anak istri ngembasang putra malantaran lokika sanggraha kandugi pecak nénten katiwakin upakara/upacara pabiakawonan miwah widhi widhana, sané cuntaka :
 1. Sang ngembasang putra.
 2. Putrané sané kaembasang.
- la. Mamitra ngalang, sané cuntaka : sang nglaksanayang mamitra ngalang punika.
- ma. Sad àtatàyi, sané cuntaka : sang nglaksanayang sad àtatàyi punika.
- (8) Sang tan kenéng cuntaka, luwiré :
 ha. Sang Sulinggih.
 na. Pamangku Kahyangan Tiga rikala piodalan tur sampun ngayah tigang rahina ring pura sané kaemponin utawi sampun ngalang sasih utawi ngalang tengah.
 ca. *Pemangku sane ngamargiang swadarmaning Kusuma Dewa (nyonteng).*

Pawos 57

- (1) Pamargin atiwa-tiwa utawi pangabénan kalaksanayang mapagamel kecap sastra agama miwah drestan désa.
- (2) Peputusan pangabénan, kasulurang manut Pararem.

Palet 4
Indik Manusa Yadnya.

Pawos 58

- (1) Krama Désa minakadi Krama Banjar, patut sareng nyanggra miwah niténin yan wénten sinalih tunggil krama nglaksanayang upacara Manusa Yadnya sané mabuat.
- (2) Tatacara panyanggrané inucap ring ajeng kasulurang manut Pararem.
- (3) Sang pacang nglaksanayang upacara Manusa Yadnya sané mabuat, mangda masadok ring Prajuru.
- (4) *Manusa Yadnya inggih punika, upacara-upacara dharmaning kahuripan manusa, ngawit saking panunggalan kama bang lan kama petak sajeroning guwa garbha, ngantos Pawiwahan.*
- (5) Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Palet 5
Indik Bhuta Yadnya.

Pawos 59

- (1) Désa Adat Kerobokan nglaksanayang Bhuta Yadnya, marep ring kabuatan Désa Adat Kerobokan.
- (2) Pidabdab pamargin Bhuta Yadnya inucap ring ajeng, mapagamel kecap sastra agama, kaanutang ring drestan Désa, sané kapikukuh antuk Pararem.
- (3) Krama Désa minakadi Krama Banjar patut sareng nyanggra yan wénten sinalih tunggil krama sané nglaksanayang upacara Bhuta Yadnya sané mabuat.
- (4) Sang pacang nglaksanayang upacara Bhuta Yadnya sané mabuat, mangda masadok ring Prajuru.

Pawos 60

- (1) Bhuta Yadnya, inggih punika : upakara-upakara banten pabiakala utawi labaan miwah pacaruan sarwa prani katur ring prethiwi, ring pura, sanggah / mrajan, ring manusa, ring bebutan :

- ha. Ring sarwa tumuwuh, ritatkala Tumpek Pangatag.
 - na. Ring sarwa ingon-ingon, ritatkala Tumpek kandang.
 - ca. Upakara pakala-kalaan rikala mawidhi widhana kabawos pabiakala, manut genah miwah panyawangan lan rahina miwah sasih sané kamanggehang antuk I Krama Désa Adat Kerobokan, miwah ring sowang-sowang pakubon.
- (2) Upakara-upakara pabiakalan ring prethiwi miwah ring kahyangan lan bebutan kabawos macaru, kamargiang kanista, madhyama, utama, manut kabuatan, luwiré :
- ha. Caru Eka Sata.
 - na. Caru Panca Sata.
 - ca. Caru Panca Sanak.
 - ra. Caru Resi Gana.
 - ka. Caru Manca Kelud.
 - da. Tawur.
- (3) Yéning wénten kadurmanggalan jagat sané kacihnayang antuk ciri-ciri :
- ha. Jadma akéh kageringan.
 - na. Entik-entikan akeh kageringan.
 - ca. Sato akeh kageringan.
 - ra. Miwah cecirén siosan minakadi sasab mranané tan pepegatan, patut kawéntenang ngusaba desa lan ngusaba nini.
- (4) Sajawaning upakara sakadi ring ajeng, taler kawéntenang upakara :
- ha. Yadnya sésa minakadi majot-jotan nyabran wusan ngrateng.
 - na. Masapuh-sapuh ritatkala ngaturang pujawali ring pura.

Pawos 61

Upakara Tawur Kasanga rikalaning Tilem Kasanga :

- (1) Dudonan panglaksananipun :
- ha. Ring pangelong ping 13 Sasih Kasanga, Ida Bhatara-Bhatari ring desa miwah sowang-sowang Parasanak sawewidangan Désa Adat Kerobokan kaiiring antuk krama, mapupul ring Balé Agung, salanturnya kairing lunga melasti ka segara.
 - na. Ring pangelong ping 14 Sasih Kasanga, Ida Bhatara-Bhatari nyejer ring Balé Agung, tur kakemit antuk Prajuru lan Pasanakan.

- ca. Ring Tilem Sasih Kasanga, Ida Bhatara-Bhatari sadurung mantuk ka payogannya sowang-sowang, katuran lan napak caru ring natar Balé Agung, tur Krama Désa Adat Kerobokan ngaturang pepranian.
- (2) Upakara Tawur Kasanga, kamargiang ring Tilem Sasih Kasanga, manut dudonan
 - ha. Pacaruan kawéntenang ring wates Désa lan Pempatan.
 - na. Ring kulawarga sowang-sowang, mabiakala ring natar paumahan.
 - ca. Kalanturang antuk ngrupuk minakadi mabuu-buu.
 - ra. Tan kalugra malila-lila antuk geni miwah ngrupuk jantos langkungan ring tengah wengi, réhning rahina inucap sampun nampih rahina sipeng.
- (3) Tawur Kasanga jantos puput Panyepian marep ring kabuatan Désa Adat, sami kasanggra miwah kaprabéanin antuk Désa Adat.

Pawos 62

- (1) Rikalaning Nyepi utawi Sipeng ring pananggal apisan Sasih Kadasa, sowang-sowang Krama Désa patut ngamargiang Catur Brata Panyepian, inggih punika :
 - ha. Amati geni : tan kéngin maapi-api, sajawaning :
 - 1. Ring genah raré sané durung mayusa 3 sasih;
 - 2. Ring genah matepetin wong sakit;
 - 3. Ring genah layon sang kalayusekaran.
 - na. Amati karya : tan kéngin nyambut karya, sajawaning Pacalang Désa lan Prajuru Desa, miwah sang polih uak-uakan marupa lekita pastika saking sang ngawa rat.
 - ca. Amati lelungan : tan kéngin malelungayan mrika-mriki.
 - ra. Amati lelangan : tan kéngin maoneng-onengan, ngwijilang suara ghora, nabuh gegambelan, lan sakancannya.
- (2) Panrepti Panyepian ring Désa Adat Kerobokan, kaadegang Pacalang Panyepian, kacirénin antuk :
 - ha. Destar selem lan sekar pucuk bang;
 - na. Kuaca selem;
 - ca. Selémpot poléng;
 - ra. Wastra selem;
 - ka. Maselet keris.
- (3) Sinalih tunggil Krama Désa sané madruwé anak alit, matepetin sakit, miwah madruwé layon, ring pamedalannya mangda kadagingin sawén antuk embotan pandan maka cihna wénten kapialang.

- (4) Catur Brata Panyepian punika kamargiang saking semeng jantos semeng rahinané bénjang.
- (5) Bénjangné ring pananggal ping kalih Sasih Kadasa, kawastanin Ngembak Geni, sané mapiteges panglebaran yoga samadhi, sowang-sowang krama patut saling ngaksamayang sané kawastanin Sima Krama utawi Dharma Santi.

SARGAH LIMA SUKERTA TATA PAWONGAN

Palet 1

Indik Pawiwahan.

Pawos 63

- (1) Pawiwahan inggih punika patemoning purusa pradana, malarapan panunggalangan kayun suka lila madulurin upasaksi sekala niskala,
- (2) Krama Désa minakadi Krama Banjar, patut sareng nyanggra miwah nitenin yan wénten sinalih tunggil krama sane nglaksanayang upacara Pawiwahan.
- (3) Pamargin Pawiwahan, luwiré :
 - ha. Malantaran pepadikan.
 - na. Malantaran ngorod, marangkat rihin wawu kakrunayang.
 - ca. Malantaran nyentana utawi nyentana nyeburin.
- (4) Indik Pawiwahan, Désa Adat Kerobokan, ngamanggehang Undang-Undang Perkawinan sanelumaken Nomor 1 Tahun 1974, miwah Peraturan Pemerintah Nomor 9 Tahun 1975, indik Pawiwahan.
- (5) Tatacara panglaksanannya, mapagamel kecap sastra agama, kaanutang ring drestan Désa, sané *kapikukuhin ring sajeroning Pararem*.
- (6) Sinalih tunggil krama sané pacang nglaksanayang upacara Pawiwahan, mangda masadok ring Prajuru.
- (7) Pawiwahan sane kapatutang ring Desa Adat Kerobokan inggih punika
 - ha. Sampun ngemargiang pabyakala manut sastra agama lan catur dresta desa.
 - na. Kaupasaksi antuk prajuru banjar utawi prajuru desa lan sang guru wisesa.
- (8) Pawiwahan sane ten manut kadi ring ajeng, sinanggeh *tan* patut.

Palet 2
Indik Nyapihan.

Pawos 64

- (1) Prajuru Désa minakadi Prajuru Banjar Adat, wenang sareng mawosin miwah niténin yan wénten sinalih tunggil krama sané mapikarsa pacang palas marabi, mangda nénten kadurusan dados Nyapihan.
- (2) Yan krama inucap kukuh ring pikarsannya, Désa minakadi Banjar Adat, nénten sumakuta ring pamarginnya.
- (3) Sadéréngé pastika polih pamutus saking sang *ngawiwenang* minakadi Sang Rumawos (Pengadilan Negeri), krama inucap manggeh keni tetegenan krama sakadi nguni.

Pawos 65

- (1) Tatacara palas marabian, madudonan sakadi ring sor :
 - ha. Nahur prabéya pasaksi sinalih tunggil *sami pada atenga*.
 - na. Pagunakayan sami polih pahan.
 - ca. Pabekel, tadtadan sowang-sowang kekuasayang niri- niri, sakéwanten indik warisan kakuasayang antuk purusa.
 - ra. *Ngawuruhin* miwah ngupajiwa pratisentana manut swadharmaning guru rupaka.
 - ka. Mapamit saking mrajan *Purusa*.
- (2) Prade ri wekas sang palas marabian punika kacihnan adung malih, patut :
 - ha. Ngamargiang upacara pawiwahan malih.
 - na. Kadanda nikel saking palasé.

Pawos 66

- (1) Wusan mapikuren riantukan sinalih tunggil lina, kawastanin balu, minakadi balu lanang utawi istri.
- (2) Balu, kabinayang dados :
 - ha. Balu luh wit sentana rajeg miwah balu luh boya sentana rajeg;
 - na. Balu muani kapurusa (wit sentana) miwah balu muani nyeburin (boya wit sentana).

- (3) Swadharmaning balu inucap, patut :
- ha. Ngamanggehang patibrata tan patut ngamargiang paradara/drati krama.
 - na. Nguasayang waris gunakaya, tan dados ngadol, ngadéang, makidihang lan séwosan ring punika, sajawaning polih kabébasan saking pianak utawi kulawarga pinih tampek saking rabiné pradé okané kantun alit-alit.
 - ca. Kéngin ngidih sentana pradé kacumpuin antuk kulawarga kapurusa.
 - ra. Kawenangang mawiwaha malih, pradé wénten kabébasan saking kulawarga kapurusa.
- (4) Balu kaucap tan pageh, sakadi ring sor :
- ha. Drati krama utawi paradara.
 - na. Matilar saking pakubon tan pasadok jantos 6 (nem) sasih.
 - ca. Lémpas ring swadharma séwos-séwosan minakadi nénten prasida ngeséhin solah prawreti marep ring pituduh kulawarga kapurusa.

Palet 3

Indik Sentana

Pawos 67

- (1) Sentana wénten kalih pawos, sané kaucap pratisentana miwah sentana peperasan.
- (2) Pratisentana, inggih punika sentana sané metu saking pawiwahan sané kapatut.
- (3) Pradé pawiwahané tan ngwetuang sentana, kéngin ngidih sentana antuk upasaksi sekala-niskala sané kawastanin sentana peperasan.
- (4) Pradé pawiwahané tan kapatut ngwetuang sentana, mangda tan kantun kawastanin bebinjat utawi astra, patut kamanggala antuk panyangaskara.
- (5) Sentana rajeg inggih punika, pratisentana wadon (pradhana) sané kamanggehang lanang (purusa) tur rikala nglaksanayang upacara pawiwahan, lanangé patut nyeburin.
- (6) Sang kéngin kaarsayang dados sentana rajeg inucap ring wiwit (5) inggih punika :
 - ha. Pratisentana wadon tunggal utawi sinalih tunggil pratisensana wadon yéning maka sami pratisentanané wadon.
 - na. Sampun kamanggehang dados pratisentana purusa.
 - ca. Kapawiwahan kaceburin, kautamayang antuk jadma sané maagama Hindu utawi jadma sané maagama siosan tur sampun nglaksanayang pamarisuda raga utawi *sudi widani*.

- ra. Sang ngamanggehang sentana rajeg patut masadok ring Prajuru Banjar Adat tur Kelihan Banjar patut nyiarang ring Banjar saha lantur ngaturang ring Prajuru banjar / Adat.

Pawos 68

- (1) Ngamanggehang sentana rajeg patut nganutin dudonan, mapracihna antuk artha brana pamerasan sané kasaksiang sekala-niskala.
- (2) Sapa sira ugi krama sané pacang ngidih sentana, patut masadok ring Bendésa, sanistané asasih sadéréng pamerasan.
- (3) Bendésa, kawakilin antuk Kelihan - kelihan Banjar nyiarang ring Banjar Adatnya sowang-sowang, tur sapa sira ugi tan lila mangda nguningang ring Bandésa, masengker kalih wuku sadurung pamerasan.
- (4) Prajuru minakadi Bendésa patut digelis mawosin saha nibakang pamutus nepék ring catur dresta miwah Pararem.
- (5) Pradé sulur peperasané tan manut ring kecapé ring ajeng, Prajuru minakadi Bendésa wenang ngandegang upacara peperasané, saha ngicén tuntunan, mangda bebawosan sulur peperasan utawi wicarannya kapuputang rihin.

Pawos 69

- (1) *Paperasan* sané kapatut ring Désa Adat Kerobokan, ri sampuné kacihnayang antuk :
 - ha. Widhi widhana pamerasan.
 - na. Kasaksinin antuk Prajuru Désa sané makélingang utawi nglekitayang.
 - ca. Kasiarang ring wewidangan désané.
- (2) Sané kapatut peras anggén sentana kadi ring sor :
 - ha. Jadma maagama Hindu.
 - na. Kulawarga saking purusa, pradé tan wénten kengin saking wadon yéning taler tan wénten wawu kéngin sakama-kama (sakita kayun).
 - ca. Kautamayang saking waris pancer kapurusa.
 - ra. Sinalih tunggil mawit saking kulawarga tunggal sanggah utawi mrajan, paibon lan dadia, utawi ngambil anak tios sakéwanten sang maagama Hindu.
- (3) Kéngin ngangkat sentana langkungan ring adiri, lanang wiadin wadon.

Palet 4
Indik Warisan.

Pawos 70

- (1) Warisan, inggih punika artha brana saha ayah-ayahan ngupadi sukerta sekala-niskala saking kaluhurannya marep ring turunannya.
- (2) Sané sinanggeh warisan, inggih punika :
 - ha. Duwé tengah, minakadi tanah, sanggah/mrajan, pusaka lan sané siosan.
 - na. Pagunakayan, tadtadan/jiwa dana, utang piutang.
- (3) Wawu kéngin kabawos warisan, pradá wénten
 - ha. Sang ngwarisang.
 - na. Katurunannya (ahli waris).
 - ca. Artha brana, tetegenan (ayah-ayah) makacihna warisan.

Pawos 71

- (1) Ahli waris, luwiré :
 - ha. Pratisentana purusa.
 - na. Pratisentana wadon (sentana rajeg).
 - ca. Sentana peperasan lanang/wadon.
- (3) Pradá tan wénten sakadi ring ajeng, sané sinanggeh ahli waris :
 - ha. Turunan purusa pernah ngunggahang makadi rerama lanang, pekak, salanturnya, rerama di misan, rerama di mindon.
 - na. Turunan purusa pernah kasamping makadi kaponakan, kaponakan dimisan miwah kaponakan dimindon.
- (3) Swadharmaning ahli waris, patut :
 - ha. Nerima saha nguasayang tetamian pahan kaluhurannya, makadi ngrempon sanggah/mrajan, pura, saha pangupakarannya miwah ayah-ayahan pawaris.
 - na. Ngabénang pawaris saha nglanturang upacara-upacara pitra Yadnyannya.
 - ca. Nahurin utang-utang pawaris manut panglokika.

Pawos 72

Pidabdab waris kawaris ring Désa Adat Kerobokan :

- (1) Warisan, wawu kéngin kaepah, risampun kalaksanayang upacara Pitra Yadnya lan utang-utang pawaris buntas katahur.
- (2) Para ahli waris sami polih pahan sangkaning pagunakaya.
- (3) Sinalih tunggil ahli waris kéngin tan polih pahan pradé :
 - ha. Nilar kawitan lan sasananing agama Hindu.
 - na. Alpaka guru rupaka.
 - ca. Sentana rajeg utawi pratisentana nyeburin késah mawiwaha, sowang-sowang kabawos ninggal kadaton.
- (4) Boya ahli waris, kéngin muponin hasil anut dudonan inggih punika :
 - ha. Sentana luh, salami durung késah mawiwaha.
 - na. Balu luh wiadin muani nyeburin (sowang-sowang boya sentana).
- (5) Pawaris kéngin mawéwéh rikala maurip pinaka jiwa dana, tadtadan/pabekel, makacihna pawéwéh tetep ring oka sané késah mawiwaha.

Pawos 73

- (1) Pradé sajeroning pakulawargan wénten ahli waris langkungan ring adiri, patut :
 - ha. Kawéntenang paigum indik pahan waris inucap;
 - na. Yan tan prasida, katunasang tetimbang ring Prajuru;
 - ca. Pradé taler tan wénten cumpu ring panepas Prajuru, kaaturang ring Kerta Désa; pradé taler tan kacumponin, karerehang pamuput ring paruman desa, maka wasaning pamuput ring desa, ripet ten cumpu kéngin katunasang ring Kerta Alit / Kerta Madya / Kerta Agung, kaping untat Sang Rumawos (Pengadilan Negeri).
- (2) Pradé wénten karang kaputungan utawi tan wenten sané ngwarisin, Désané wenang nuréksa sulur pakulawaragannya sané dumun tur lantur kasiarang ring Désa, mangda sang patut ngwarisin, digelis nyelediinin karang inucap.
- (3) Pradé wates pawanengan 3 sasih sasampun kasiarang ring sowang-sowang Banjar taler tan wénten kulawarga sané nyelediinin, karang inucap wenang kaambil antuk Désa Adat, tur kaanggén sapatutnya manut pararem kadulurin antuk nglaksanayang pitra Yadnyan sang lina sané pecak ngamong karang inucap.

SARGAH NEM
SUKERTAN TATA PALEMAHAN

Palet 1

Karang, Tegal, lan Carik.

Pawos 74

- (1) Sahanan karang paumahan patut :
 - ha. Wénten watesipun sané pastika;
 - na. Mapamedalan ka rurungé utawi ka marginé, tan dados wénten karang kabebeng.
- (2) Prajuru desa patut ngutsahayang sahanan pakarangan Krama Désa, mangda kawéntenannyané sakadi inucap ring ajeng.

Pawos 75

- (1) *Sahanan Krama Banjar/Désa patut ngwatesin palemahan pakarangan nyané sowang-sowang jantos trepti nyatur genah.*
- (2) Wates sané marep ka marginé patut katémbok utawi kapagehin olih sang nruwénang karang, tur genah témbok utawi pagehan punika dohnyané paling kedik 0, 50 méter saking bibih got (jelingjingan margi).
- (3) Yéning pakarangan punika wénten telajakannyané, telajakan punika patut kapiara olih sang nruwénang karang.
- (4) Yan wénten anak padem ring tegal wiadin ring carik anak lian :
 - ha. Ring tegal / carik punika, patut kalaksanayang widhi widhana manut kecap sastra agama.
 - na. Ngentasang sawa ring tegal wiadin carik anak lian, patut nganutin pituduh Prajuru Désa miwah Prajuru Subak.
 - ca. Tegal utawi carik sané kaentap pinih rihin patut kaprayascitta olih sang nruwénang sawa, tegal utawi carik sané kaentap ungkuran wantah kasiratin tirtha prayascitta kéwanten.
 - ra. Nanging yan ngentasang sawa ring tukad, pangkung utawi telabah, punika nénten kadulurin antuk tirtha pamrayascitta.

- ka. Tan wenang ngenahang napi luwir sané sinanggeh ngletehin karang paumahan bilih-bilih yan kaletelahannya lantur nglimbak jantos ngletehin Désa Adat manut kecap sastra agama.
- (5) Sinalih tunggil Krama Désa Adat, nénten kadadosang
- ha. Ngalah-alah margi, tegal désa, karang krama lian, tegal utawi carik krama liyan, lan sakancan punika;
- na. Ngalah-alah tegak kahyangan, sétra lan sakancan tegak sané sinanggeh suci.
- (6) Pradé wénten mamurug kecapé ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk upakara pamarisuda manut kecap sastra agama.
- (7) Yening wenten krama jagi ngadol utawi ngontrakang tanah pekarangan, tegalan utawi tanah carik, wenang masadok ring prajuru banjar utawi prajuru subak lan prajuru desa Adat.

Palet 2

Pepayonan

Pawos 76

- (1) Ngawit nandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sané jantos ngliwat wates, wenang kasepatgantungin.
- (2) Pepayonan sané ngungkuli mawastu mayanin ka pisaga, sang nruwénang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwénang arsa ngrebah utawi notor wit pepayonané punika.
- (3) Pradéné sampun kawara taler tan wénten utsahan sang nruwénang, sang rumasa katetehan wenang masadok ring Prajuru, tur risampuné kaparitas kandugi wénten pituduh Prajuru, wawu wit pepayonané punika kéngin karebah, sakéwanten panukun patin wit pepayonané punika patut katahur olih sang rumasa katetehan manut panglokikan sang nepasin, tur wit pepayonané sané karebah punika, kasukserah ring sang nruwénang.
- (4) Sang patut keni pamidanda panyangaskara saha prabéa manut pararem, marep ring wewangunan sang karubuhan, luwiré :
- ha. Sang nruwénang wit pepayonan sané sinanggeh mayanin, pradé pungkut padidi tur ngrubuhin wewangunan krama tiosan;

- na. Sang notor, monggol utawi ngrebah taru, tur ngrubuhin wewangunan krama tiosan.
- (5) Krama Désa patut ngamanggehang kawredian tanem tuwuh sané ngawinang Désané asri tur lestari sané kawastanin Bhutahita, sané matesges kalestarian lingkungan hidup.
- (6) *Krama Desa patut nandur tur ngalestariang sarwa sari, sarwa woh-wohan utawi sarwa entik-entikan sane wenten kawigunan nyane pinaka serana upakara yadnya.*
- (7) Sinalih tunggil krama sané pacang ngrebah pepayonan minakadi tanem tuwuh sané ngawinang Désané asri tur lestari, patut masadok tur nunas lelugrahan ring Prajuru Désa Adat.

Palet 3

Wewangunan

Pawos 77

- (1) Nangken ngwangun, sowang-sowang krama patut :
- ha. Masadok ring Prajuru, pamekas marep ring wewangunan sané mapanyaitan minakadi menengin wates;
- na. Nganggé Asta Bhùmi miwah gegulak Asta Kosali, sanistannya manut ring patitisé ka niskala.
- ca. Nénten nyayubin ka pisaga.
- (2) Pradé wewangunané jantos nyayubin ka pisaga, bilih-bilih témboké ring telenging wates, risampuné kawara tur kairing mapiguman taler tan wénten utsahan sang nruwénang, kangkat kasadokang ring Prajuru; sasampuné kaparitas tur wénten pituduh Prajuru, sang nruwénang wewangunan wenang keni danda manut Pararem, tur témbok inucap patut kagubar olih sang nruwénang, sanistannya mangda kakaryanang abangan.
- (3) Sapasira ugi Krama Désa sané jagi ngwangun paumahan miwah wewangunan punapi luwir ring sisin marginé, wewangunan punika mangda dohnyané saking telenging margi manut pararem.
- (4) *Nenten kalugra ngewangun metingkat sajeroning 2,5 m utawi adepe agung saking wates Pura Kahyangan Tiga.Yaning Mamurug kakeniang pamidanda manut pararem.*

Palet 4
Wewalungan

Pawos 78

- (1) Sahanan warga désa sané miara wewalungan : bawi, banténg lan sakancan punika, mangda sayaga niténin kabersihan kandang, negul minakadi nglogor wewalungannya, mangda nénten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Pradé wénten wewalungan malumbar utawi ngeléb tur ngrusak karang utawi pabianan krama séwosan, risampuné kawara taler nénten wénten utsahan sang nruwénang, yan wewalungan punika malih ngrusak karang utawi pabianan krama séwosan, wewalungan punika kéngin kataban, tur sang nruwénang wenang katibakin danda ngwaliang panukun wit tetandurané sané karusak, saha nahur panebas pepiaran tetabanan, manut panglokikan Prajuru Désa / Banjar Adat.
- (3) Yéning sajeroning asasih jantos ping tiga wewalungan punika mataban sakadi kecapé ring ajeng, wewalungan punika wenang kaambil olih sang naban tan kéngin katebus malih, tur indiké kadi punika patut kasadokang ring Kelihan Banjar olih sang naban.

Pawos 79

- (1) Pradé wénten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampuné kaparitas antuk Prajuru, sang nruwénang wewalungan inucap wenang keni déwa danda lan artha danda, agung alitipun manut kecap sastra agama, sané kapikukuh antuk Pararem.
- (2) Yening wewalungané punika jantos ngrusak wewangunan sané sinanggeh suci, sang nruwénang wewalungané punika patut keni prabéan karusakan sané kawetuang olih wewalungané punika.

Pawos 80

- (1) Krama Désa patut nyerayanin wewalungan miwah sarwa prani, tan kapatutang mademang paksi, nuba ulam lan sakancan punika, pinaka sinalih tunggil utsahan Krama Désa ngardi Bhutahita.
- (2) Sang mamurug kecapé ring ajeng, wenang keni danda manut Pararem.

Palet 5

Indik Karesikan utawi Kabersihan

Pawos 81

- (1) Asing-asing Warga Désa tan wenang :
 - ha. Ngembahang toya sané mawit saking badan wewalungan, paciringan, kamar mandi, pawaregan miwah sané siosan sané ngwetuang romon, bilih-bilih jantos ngwetuang ambu kawon ka pakarangan anak lian miwah ka marginé.
 - na. Ngentungang luu-luu ka pakarangan anak lian, ka marginé miwah ka telabahé.
- (2) Sowang-sowang Warga Désa patut makarya paciringan, mangda kabresihan pakarangan miwah karahajengan Désané prasida kapanggih.
- (3) Sang mamurug kecapé ring ajeng, patut keni pamidanda manut Pararem.

Palet 6

Indik Dusta lan Bhaya.

Pawos 82

- (1) Bacakan bhaya luwiré : jiwabhaya, arthabhaya, agnibhaya, toyabhaya, lindubhaya, duracara ring agama, lan sakancan punika sané ketahipun kawastanin pancabhaya.
- (2) Sinalih krama sané manggihin praciha pastika wénténésahanan dusta miwah pañcabhaya, patut pramangkin ugi atur *supéksa* ring Prajuru.
- (3) Bilih-bilih kawéntenanipun mabuat, sang nguningin indiké punika, patut digelis nepak Kulkul Banjar.
- (4) Sang manggihin kahanan jiwabhaya, patut digelis nepak kulkul bulus.

- (5) Pradé désané kahanan jiwabhaya, Krama Désané patut ngaturang upacara pamahayun désa manut kecap sastra agama sané kapikukuh antuk krama, tur sang ngwetuang jiwabhaya, katur ring sang ngawawenang.

Pawos 83

- (1) Sinalih tunggil Krama Désa sané kaicalan miwah kamalingan pradé pacang maseserep, patut nunas pituduh prajuru Banjar.
- (2) Pradé genahé maseserep nglangkungin Banjar siosan, patut nunas kacumpuan ring Kelihan Banjaré irika.

Pawos 84

- (1) Sowang-sowang Krama Désa tan kapatutang mapailonan ring dusta; sang kacihnan mapailonan ring dusta patut katibakin danda manut Pararem.
- (2) Indik ngrereh reramon minakadi daun kelapa, ron, miwah sané séwosan ring pabianan krama tiosan ri kenjean suwung, kasulurang manut Pararem.
- (3) Indik ngranjingin pakubon utawi pakarangan krama séwosan rikala suwung, mawastu raris sang maderbé pakubon utawi pakarangan punika kaicalan, sang sane ngeranjing patut katitenin kasulurang manut Pararem.
- (4) Indik ngranjingin pakubon utawi pakarangan krama séwosan rikala suwung riantukan wénten pisarat sané mabuat minakadi mapangarah miwah kabuatan sané liyanan, kasulurang manut Pararem.

Pawos 85

- (1) Sahanan Warga Désa yan polih nuduk barang napi luwiré ring wewidangan Désa Adat Kerobokan, patut atur supéksa ring Prajuru Banjarnyane.
- (2) Prajuru Banjar inucap patut nyiarang barang dedudukan punika, mangda sang nruwénang mawali ngamolihang barangnyané.
- (3) Sang mariangken patut nyihnayang angga sané ngawinang pastika munggwing barangé punika yukti-yukti padruwéannya.
- (4) Pradé jantos tigang sasih taler tan wénten anak ngélingin barangé punika, wenang kadruwénang olih sang nuduk barangé punika.

Palet 7

Indik Panyanggran Karyan Krama.

Pawos 86

- (1) Sinalih tunggil Krama Banjar, ritatkala ngwéntenang karya suka duka, patut kasanggra antuk Krama Banjar jantos puput.
- (2) Tatacara panyanggrané inucap ring ajeng, kasulurang manut Pararem.
- (3) Sowang-sowang Krama Banjar sané pacang nangun karya suka duka sané mabuat, mangda masadok ring Prajuru Banjar.

SARGAH PITU

WICARA LAN PAMIDANDA

Palet 1

Indik Wicara

Pawos 87

- (1) Sané wenang mawosin wicara ring wewengkon Désa Adat Kerobokan, inggih punika Prajuru Désa / Bendésa miwah Kertha Désa.
- (2) Pradé sang mawicara tan cumpu ring Pamutus Kertha Désa, kéngin nunasang ring Sabha/pesangkepan Desa, prade durung cumpu, katincapang ring Majelis Alit, Majelis Madya/Majelis Utama Desa Adat, pinih untat Sang Rumawos (Pengadilan Negeri).
- (3) Sahanan wicara sané mawit saking kacorahan sakaluwiré sané sinanggeh nungkasin daging Awig-awig, Pasuara miwah Pararem Désa / Banjar Adat, patut digelis kabawosin olih Prajuru, nénten nyantos pasadok malih.
- (4) Sajaba wicara sakadi ring ajeng, patut nyantosin pasadok sang nunas bawos.
- (5) Panepasé mangda pastika nyantenang iwang patut malarapan Tripramana, inggih punika : saksi, likita, bukti, tur panepasé tan marep nepék ring Catur Dresta.

Palet 2
Indik Pamidanda

Pawos 88

- (1) Sakaluwir pakaryan Désa madaging pamidanda.
- (2) Désané, wenang nibakang pamidanda ring Warga Désa sané sisip kalaksanayang antuk Prajuru sajeroning Paruman Krama Désa.
- (3) Pamidanda sané katiwakang, mangda pastika nepék ring Catur Upàya Sandhi, luwiré :
 - ha. Sama : Krama miwah Prajuru sami keni pamidanda.
 - na. Bhéda : Tetiwak pamidanda wenang mabinayan manut agung alit kasisipan.
 - ca. Dàna : Pamidanda sané kalaksanayang madasar antuk kayun tresna asih.
 - ra. Danda : Pamidanda kalaksanayang wantah matetujon mralina kasisipan utawi pangajeg sajeroning ngamanggehang kasudamalan Désa.
- (4) Bacakan pamidanda, luwiré :
 - ha. Artha danda.
 - na. Sangaskara Danda.
 - ca. Kanorayang / *pecat*.

SARGAH KUTUS
NGUWAH-UWUHIN AWIG-AWIG

Pawos 89

- (1) Nguwah-uwuhin Awig-awig Désa Adat puniki, wantah kéngin kalaksanayang antuk Paruman Désa.
- (2) Pakarsané nguwah-uwuhin punika, mangda mawit saking pakarsan Krama Désa, yadiastun kamedalang antuk sinalih tunggil Prajuru utawi sinarengan tur kacumponin antuk pinih kedik kalih pah tiga lintang saking sang ngamiletin paruman.

Pawos 90

- (1) Sakaluwiring indik sané sampun wénten sadéréng awig-awig puniki kasurat, mangda kaanutang ring sadaging awig-awig puniki.

- (2) Sakaluwir sané durung kasurat sajeroning awig-awig puniki, menawi kangkat kanggén mitegepin awig-awig puniki, pacang kasurat *ring sajeroning* Pararem.

NAWAMAS SARGAH SAMÀPTA

Pawos 91

- (1) Awig-awig puniki kawastanin Awig-awig Désa Adat Kerobokan.
(2) Awig-awig puniki kamargiang ngawit saking kaingkupin utawi kararemin.

Pawos 92

- (1) Awig - awig puniki madasar antuk awig-awig sane sampun kacumponin oleh Paruman Desa Adat Kerobokan duk rahina Redite Pon Wuku Medangsia tanggal 24 April 1994.
(2) Awig-awig puniki malih kaparipurnayang lan sampun kasobyahang, kapiteges lan *kacumpuang* duk Paruman Paripurna Desa Adat rahina Saniscara Wage Wuku Julungwangi tanggal 3 Oktober 2009, kalinggatanganin antuk Bandesa kapikukuh antuk Bupati saha kailikitiyang utawi kacatet ring Pemerintah Kabupaten Badung.
(3) Luwir sang nglinggatanganin :

Bandesa Adat Kerobokan,



A.A. Putu Sutarja, SH.



Parajuru Desa Adat Kerobokan
Penyarikan,



A.A. Putu Sudarma, ST.

Saksi - Saksi

Manggala Majelis Alit Kecamatan Kuta Utara,

I Gusti Ngurah Supartha, S.Pd

Manggala Majelis Madya Kabupaten Badung,

Ida Bagus Gde Puja

Bupati Badung

Anak Agung Gde Agung, SH.